

西  
巡  
大  
事  
記

西巡大事記卷二

光緒二十六年八月下至閏八月

目錄

李鴻章奏遵旨北上會議恭報起程日期摺八月二十四日

端方致樞垣譯呈李鴻章奏請降旨俟外兵全撤即行還宮電

二十四日

李鴻章等奏請降旨先懲禍首俾與各國開議摺二十五日

奕劻奏陳接晤各國公使情形摺二十五日

何乃瑩奏就晉省現在情形預籌布置辦法摺二十九日

李盛鐸奏拳匪開釁和戰兩難請頒國書委曲遷就摺閏八月初一日

榮祿廷雍奏遵旨嚴防保定並布置情形摺初二日

奕劻等奏合詞籲懇回鑾以固根本摺初三日

奕劻等奏錄呈各國使臣請早回鑾來函片初三日

奕劻等奏請降旨表明惋惜被戕德使及日本書記官片初三日

致日本國皇惋惜書記生杉山彬並派那桐致祭國書初三日

奕劻奏俄允交還東三省請派增祺長順接收電初六日

劉坤一等奏任將不宜再誤衛軍宜加慎選以定危局摺初十日

呂海寰等奏請誅禍首速籌和議電十一日

楊儒奏俄外部言如真心和好必須回鑾電十一日

李鴻章奏美允開議仍請回鑾俄無佔地之意電十二日

李鴻章奏報遼旨在津接印日期摺十四日

李鴻章奏津局庫銀鎗礮被洋人擄掠罄盡片十四日

劉坤一等致樞垣擬請各領電各外部勸聯軍毋往魯境電十五日  
榮祿奏久駐保定於大局有礙擬赴行在摺十七日

劉坤一等奏偏安必不可成請降旨事定回京以安大局摺十九日

劉坤一等奏陝省拒敵甚難不宜遷都片十九日

劉坤一等奏恐各國分佔要地停戰無日仍請明降諭旨片十九日

奕劻奏各國陸續撤兵及京城近日情形摺二十日

奕劻奏致俄德日國電已分別知照英法等國請併予國電片二十日

奕劻奏德義法駐使一併函請回鑾錄呈來函片二十日

奕劻奏請畀劉坤一張之洞全權之任電商和議片二十日

呂海寰奏德皇覆書昭雪欽差頗爲欣慰惟須懲辦禍首電二十日

李盛鐸奏日本覆書勸早定和局停幸陝西電二十日

王培佑奏陳京城內外近日情形摺二十二日

李盛鐸奏謹陳款局辦法五端電二十四日

李盛鐸致樞垣中國所派議和大臣日廷無異言電二十五日

廷雍呈樞垣法兵到保迫令悉插法旗應付術窮請示稟二十六日

奕劻等奏美外部謂中國自辦罪魁可止洋兵西犯電二十六日

伍廷芳致樞垣美總統覆書謂嚴懲禍首即可議和電二十六日

劉坤一張之洞奏各使首以懲辦禍首爲請否則不能停戰電二十九日

西巡大事記卷二

黃巖弢夫王彥威輯

男希隱亮編

孫孝章敬立校

光緒二十六年八月二十四日 駐蹕太原府城

李鴻章奏  
遵旨北上  
會議恭報  
起程日期  
摺

全權大臣大學士直隸總督臣李鴻章奏爲遵旨北上會議恭報起程日期仰祈聖鑒事竊臣於八月十四日接直隸藩司廷雍電稱七月三十日奉上諭全權大臣李鴻章着准其便宜行事將應辦事宜迅速辦理朕不爲遙制接此旨後先行覆奏以慰廑系欽此又於八月十六日接山東巡撫袁世凱來電八月初三日奉上諭全權大臣便宜行事大

學士李鴻章著卽乘輪船來京會同慶親王商辦一切事宜毋延欽此  
仰蒙眷倚優隆迥逾常格欽悚莫名臣自抵上海卽與各國駐使迭次  
電商該外部業將各外部覆語節經具奏在案上月聯軍入京乘輿西  
幸北望宮廷徒深憤恨曾由六百里加緊請旨添派慶親王等會同開  
議此次變出非常各國之意決非空言所能就範臣往返電商唇焦額  
禿俄日法美雖稍有通融德英仍別有意見一旦德國統帶重兵來華  
更不知其意向所在是議和一事就目前情形而論尙無把握臣受恩  
深重具有天良君父之難理應奔赴惟視其心力之所能爲冀圖挽救  
至於成敗利鈍非可逆覩現聞慶親王已遵旨回京臣卽於八月二十  
一日借乘俄艦由海道赴津如前途洋兵無阻卽行晉京與慶親王會

端方致李  
鴻章奏請  
降旨俟外  
兵全撤即  
行還宮電

商一切設法速辦以慰宸廬所有違旨覆奏並起程日期仍電由護陝西撫臣端方代爲繕摺由驛六百里加緊馳陳伏乞皇太后皇上聖鑒謹奏光緒二十六年八月二十日發二十四日奉硃批知道了著俟到津後即行進京會商一切力爲其難是所切盼

護理陝西巡撫布政使端方謹將大學士調任直隸總督李鴻章上海來電照譯由六百里加緊夾板呈遞行在軍機處

前奉便宜行事諭旨錄寄各國使領接楊儒篠稱譯交外部載稱便宜行事在中國仍是虛文非眞代君行權如歐洲故事且細繹諭旨無還宮意勢必遲延牽制議結無期他國早慮及此果爾各國一律撤兵德統帥來恐別有辦法速電傳相請貴大皇帝降旨略謂各國兵來本係



救使現俄已踐約撤兵各國自應照辦刻下亟須籌議善後遠道萬難遙制一俟各軍全撤准即日還宮以便開議茲特派某大臣與各國統領接洽交收都城又特授某大臣辦事全權向各國商議云云如此措詞俄便易居間排解可冀各國一律撤兵迅速議結等語務乞代奏以救危局云鴻查欽奉八月十五日電旨俟抵太原後體察情形再定進止洵爲慎重萬全之策似可准俄外部所請降旨俟各國軍全撤即行還宮慶親王現已到京應請特派與各國統領接洽交收都城臣鴻章定於二十一日乘俄艦赴津如各使來會即與商議是否有當伏候聖裁惟聞俄商各國同撤德英未允旣請俄居間不妨有此詔旨耳乞代奏鴻效

李鴻章等  
奏請降旨  
先懲禍首  
俾與各國

上諭奕劻李鴻章據李鴻章電奏請明降諭旨等語俄兵先撤雖有此  
言尙未見諸實事亦斷無回鑾後再行開議之理所請礙難准行惟俄  
兵如果先撤該王等自可援以爲詞勸各國一律撤兵著即體察情形  
速籌辦理

懿旨所有隨扈宮軍道路縣長異常辛苦馬玉崑一軍著賞銀一萬兩  
董福祥馬隊賞銀三千兩岑春煊一軍賞銀二千兩

岑春煊奏教民齊集潞城請降諭解散摺

二十五日 駐蹕太原府城

李鴻章劉坤一張之洞袁世凱奏現在事機萬緊各國使臣必欲先辦  
主持拳黨之人方肯開議公憤所在勢難偏護若其遷延不辦恐各國

開議摺

奕劻奏陳  
接晤各國  
公使情形  
摺

變其宗旨事將不可收拾應請聖明立斷先將統率拳匪之莊親王載  
勛協辦大學士剛毅右翼總兵載瀾左翼總兵英年及庇縱拳匪之端  
郡王載漪查辦不實之趙舒翹先行分別革職撤差聽候懲辦明降諭  
旨歸罪於該王大臣等以謝天下以昭聖德臣鴻章即可宣布各國與  
之剋期開議伏乞聖斷施行摺六百里由謹陝撫端方代遞

上諭寄奕劻李鴻章據李鴻章等奏事機萬緊請先懲禍首一摺李鴻  
章計日到京著奕劻與該大學士體察各國實情究竟如何切實會商  
具奏請旨

奴才奕劻奏爲謹將接晤各國公使情形先行奏陳恭摺仰祈聖鑒事  
竊奴才於宣化途次奉命回京辦理和議事宜遵於本月初十日馳抵

京城業將到京日期專摺具奏在案十一日總稅務司赫德來見告以此次遵旨回京便宜行事一俟全權大臣李鴻章來京即可訂期開議囑其隨時幫助等因並由奴才恭錄諭旨照會日領銜使臣葛絡幹囑轉達各國使臣去後十二日日本統兵大臣福島交到大理寺卿盛宣懷七月二十四日上海來電據稱李鴻章刻尙在滬專俟奴才到京即行航海前來當由奴才電催李鴻章速由海道來京商辦和議仍由日本兵官福島轉電上海未知何日始達奴才以款事一時未能開議而各國使臣現在京城自應先行接晤以資聯絡因於十三日偕同總理衙門大臣那桐往拜俄英美日法意比日本各公使備述此次拳教相仇致使各國動兵並婉謝各國洋兵保護宗社臣民盛意德國使館以

該國新派使臣刻未到京請俟公使到後再行接晤奴才與各該使等談次僉稱各國仍願修好惟尙未奉到本國國家訓條無從議辦現聞順直境內尙有義和拳不時攻擊教堂擬派洋兵前往各村莊勦捕但恐良莠不分請中國自行實力勦辦勿再貽誤並據俄使格爾思聲稱豐臺一帶現修鐵路仍有義和拳放鎗滋事請一併查拿辦理而總稅務司亦云近日南苑內時有鎗聲經洋兵十餘人馳往攻擊竟鎗斃義和團數百足見此輩不足倚恃只能貽累國家請從嚴捕治勿再搖惑各等語當經咨行護直隸總督廷雍迅速派幹員於順直境內查辦解散俾免生靈塗炭另滋事端十四日俄使格爾思來見據稱東三省並未停戰於和局大有妨礙請電各該將軍先行停戰俄國亦斷無再行

開戰之理庶將來議款較有裨益奴才再四籌思若不停戰難以開議亦經電該將軍等遵照由俄使轉電在案此十三等日與各國使臣並總稅務司會晤之情形也伏查和局一日不定人心一日不安李鴻章現尙在滬雖經奴才電催到京尙需時日而各國使臣均以尙未奉到本國國家訓條爲詞意存叵測難保無恫喝要挾各情事當此時勢憂危大局糜爛辦事艱窘情狀自在聖明洞鑒之中奴才受恩深重誼同休戚惟有殫竭愚忱俟李鴻章到京即將一切應議事宜和衷商權與各國使臣訂期會議但能補救一分庶獲一分之益以期仰副皇太后皇上上保宗社下拯臣民之至意所有奴才先行接晤各使臣大致情形理合恭摺具奏伏乞皇太后皇上聖鑒訓示再京城爲洋兵佔據小

民生計維艱煤米兩項尤虞缺乏刻擬招商販運商令赫德酌撥洋兵沿途保護入城以資利用而蘇民困合併聲明謹奏光緒二十六年八月十八日發二十五日奉旨寄慶親王奕劻覽奏均悉總稅務司赫德該王業已接見各國命意若何諒露端倪李鴻章現尙未到所有與各國應商事件不妨先行開議如何情形隨時具奏並催李鴻章到京會商辦理

旨寄奕劻戶部倉庫均有洋兵保護該王可令赫德婉商各國公使先行交出如能允從即着由溥良隨時撥給銀米散放各營以恤兵艱旨寄廷雍現在各國以直省拳匪蠱起中國須竭力勦除所有滋事拳民亟宜認真搜捕勿令外人以代勦爲名致釀巨患著廷雍趕緊辦理

並嚴禁拳民攻毀教堂以免不可收拾

李廷蕭代奏劉坤一電陳張春發陳澤霖兩軍可否暫歸節制摺

旨寄劉坤一所請張春發陳澤霖兩軍分紮海州清江等語該兩軍潰後尙存幾營着遵旨點驗分別扼紮仍歸該督節制陳澤霖是否可用並察看具奏

劉坤一聶緝槩奏籌辦京餉米石由清江設局轉解行在摺

又奏提取滬局軍械妥籌北運片

二十六日 駐蹕太原府城

山西巡撫毓賢奏託克託廳教民肅聚現派撥官兵協同拳勇前往勦捕大獲勝仗計殺教民九百餘名所有該處教堂一律焚燬以杜後患



摺

又奏近聞探報李鴻章及江鄂兩督准如各國使臣所請籲懇回鑾開辦和議以臣之愚竊謂不可洋人自入中華許以種種利益猶復乘釁椒擾有何信義之可言彼見兩宮西幸難肆要求復慮中國人心固結不解恐有後患爲此異辭力請回鑾藉以遂其要挾之志所奏萬不可允秦晉兩省表裏山河聖駕仍宜暫駐西安一俟和議告成洋兵盡退京畿無恙再議啟行庶不至受彼脅制伏乞聖慈垂察

又奏招募義團成軍日期片二摺一片均留中

浙江巡撫劉樹堂奏解京餉赴行在摺

湖南巡撫俞廉三奏恭請聖安並陳愚悃摺奉硃批覽奏具見悃忱仍

著將糧餉軍火源源籌解

山東巡撫袁世凱奏秋貢逾期請變通舊例免進鮮貢採辦綢緞進呈以供御用摺奉硃批著賞收該衙門知道

二十七日 駐蹕太原府城

大學士榮祿奏遵旨行抵保定俟李鴻章到津會商一切摺

又奏程炳文一軍應否飭赴行在片

旨寄榮祿事機萬緊是在意中該大學士務與奕劻切實妥商如有萬難應允之事先行駁回程文炳已飭移營潼關以外秦豫交界地方駐紮矣

直隸藩司護理直督廷雍奏遵旨派兵勦辦拳匪摺

上諭寄廷雍此次事變實由拳民激成現順直各屬拳匪聚集處所尙有三十餘州縣著即督飭呂本元等認真勦辦毋稍姑息致貽彼族口

實交榮營差弁轉送

奎俊奏張家口募勇成軍並察哈爾馬隊到防日期摺

色楞額奏口外布置情形摺

二十八日 駐蹕太原府城

鹿傳霖奏潼關黃河口礮宜排連船隻備渡摺

旨寄端方據鹿傳霖奏潼關黃河口礮易渡然亦須調齊船隻兩岸排連另以巨艦中洪接渡方無疏虞等語著端方派員豫行備辦

旨寄崑岡廷雍等現在行在各衙門公事積壓甚多著飭催各部堂官

等帶領司員迅赴行在

二十九日 駐蹕太原府城

御史彭述奏請遷都長安現宜暫緩起程摺未發下

雲南提督馮子材奏請募勁旅二萬人入衛摺

旨寄馮子材覽奏具悉老成忠勇可嘉之至惟現在籌餉艱難雲南向恃四川協餉必須與川督熟商能協濟多少餉需方可募若干兵勇著該提督先將滇邊布置完好此事且從緩議

安徽巡撫王之春奏遵旨運米石赴行在並禁運出洋摺

旨電河督松椿所有各省餉銀經過山東河南地方著松椿迅咨各督撫護送

何乃瑩奏  
就晉省現  
在情形預  
籌布置辦  
法摺

都察院左副都御史臣何乃瑩奏爲就晉省現在情形謹籌布置恭摺  
縷陳仰祈聖鑒事竊查晉省地勢表裏山河在春秋時最稱強國近因  
團教相仇變起倉猝聖駕恭奉慈輿暫幸太原並恭讀疊次諭旨飭大  
小臣工速赴行在以期整理庶務仰見宵旰憂勤無刻不以宗社民生  
爲念臣愚以爲時至今日正國家危急之秋應辦之事當相其大小遠  
近之機以爲緩急次第圖之謹釐爲四條以備采擇一宜慎籌進止以  
繫人心也以今日論至大至遠之計無過建都我朝定鼎燕京二百餘  
年據上游而控天下最爲形勝自海禁開而我之所恃以爲險者竟成  
腦後之隙輪船無阻火車又通彼族朝發夕至雖有賁獲之勇無以禦  
之不待智者而知其難守也鑒此失者不得不創遷都之議太原形勢

迫狹非可久駐關中據天下上游接壤隴蜀進戰退守可以裕如聞前  
已有旨飭陝西撫臣端方經營宮室以備巡幸仰見聖明洞察先事預  
籌惟刻下正在議和未定之時恐敵人聞我決意西遷則直隸全境非  
我所有掣動全局陵寢宗社所在何堪設想卽津沽門戶並鐵路皆視  
爲無足重輕必至別生要挾且聞直隸臣民無刻不望車駕還宮是西  
巡之議但可默定未可遽宣以繫舊京之望以安彼族之心庶和局易  
成而覬覦可免一晉省邊境宜分兵防守也撫臣毓賢扼守固關自是  
險要之地然晉省南路實以獲鹿山口爲第一重門戶井陘濰水爲第  
二重門戶若至固關則山川之險已與敵共之矣擬請旨選派健將駐  
紮獲鹿井陘一帶節節把守與固關聯絡一氣以期鞏固無虞北路則

宣大最爲要隘其餘各路山僻小徑所在多有亦宜隨處設防現在甘軍豫軍湘軍皆在省城可否酌撥分防各要隘非特可以禦敵且可使之習苦以免日久生懈或慮省城兵單不足以資保衛不知省城自撫臣收撫團民嚴辦教民之後附近極爲安帖無煩多兵駐守徒侵民食況此次搶掠行旅皆係潰兵並無土匪兵多之害已可概見但使四境嚴防省城自然無恐即使有事徵調亦不難立至總之兵宜散處不宜聚集宜習勞不宜安逸迨其生事而軍法治之不如預爲之防正所以保全之也一宜速飭各省運糧來晉以濟民食也晉省山多產糧極少本年春夏頗形亢旱自駐蹕之日始得甘雨民情歡忭然糧價仍復昂貴轉瞬嚴冬河凍購運艱難兵饑而譁民餓而斃和局未定又安知兵

事之果可消弭萬一閉關自守糧餉不濟策應無方勢將束手必須預籌以防未然臣風聞與晉省相近之直隸河南山東陝西甘肅等省秋成均尙可觀間有水路可通若空文往催終恐無濟擬請旨飭下各該省督撫臣指撥的款派員購運限十月以前陸續運到無論白米雜糧運到時即交地方官責成該糧行領賣定其價值使該行稍有餘利其正價易銀存庫即可抵各該省應解之餉兵民既不乏食餉項又無虧闕庶可免饑潰之虞一制錢宜速籌接濟也晉省經撫臣開局鑄錢與民生大有裨益近日復設立官錢局並出錢鈔以資周轉銀價得以稍增辦理已極得法惟聞錢店除官錢局之外半皆歇業省城之大兌換只此一家萬難供應且恐存錢止有此數倘或告匱勢必立窘擬請旨



電飭湖北等省速運銀圓數萬來晉亦可佐制錢之用並飭地方官出示曉諭各行仿照京城銀市辦法准其銀錢互易彼此流通錢行自不敢居奇以上四條係就目前情形當務之急臣愚皆爲思患預防起見是否有當謹恭摺縷陳管窺冒瀆伏乞皇太后皇上聖鑒訓示謹奏光緒二十六年八月二十九日

三十日 駐蹕太原府城

兩江總督劉坤一安徽巡撫王之春長江水師提督黃少春奏富有票匪滋擾大通等處現已會勦蕩平摺

上諭本年七月間富有票匪在江北桐城等處滋事經劉坤一等先後派員勦辦已將匪首余老五等拿獲餘黨悉平辦理尙屬迅速參將宋

春桂等未能先事防範咎實難辭著即行革職

盛京將軍增祺奏金州營口相繼失陷請添募勁旅以資防守摺

又奏東三省現與俄約停戰摺

上諭寄增祺現已議款停戰派慶親王奕劻大學士李鴻章與各國使臣妥商一切奉省根本重地該將軍但就現有兵力嚴防邊隘不可再生釁端所請募勇之處著不准行

晉昌奏海城失守自請嚴議摺

上諭寄增祺據晉昌奏接仗失利各摺片現在俄允停戰已由奕劻等電達計早接到該將軍惟當慎守疆土嚴密防範聽候奕劻等議定飭遵該省仁字軍晉昌業已開缺著派清銳接統認真訓練務成勁旅以

備緩急

李廷簫奏庫款支絀摺奉旨准由京餉內撥銀二十萬應用

袁世凱奏遵飭江北漕船改解入晉摺

旨寄任道鎔袁世凱江北漕船聞尙未抵德州嚴催速解

閏八月初一日 駐蹕太原府城

端方奏遵旨預備行宮事宜並請恩准迎駕摺奉硃批俟西巡有日着在潼關迎駕毋庸遠來

浙江巡撫劉樹棠奏籌撥經費解清江浦轉運局購糧西運摺

出使日本國大臣李盛鐸電奏 竊自拳匪召亂開釁列邦以致乘輿西幸凡在臣子愧憤交深開戰以來津沽北倉楊村通州我無戰不失

李盛鐸奏  
拳匪開釁  
和戰兩難  
請頒國書

委曲遷就  
摺

利自津沽以及黑龍江等城三姓琿春寧古塔奉天之金復海蓋敵無  
戰不利據西報頃遼陽鐵嶺亦失瀋陽危急上月杪俄德兵攻據北塘  
蘆臺初八據榆關京西京南皆被搶掠德人謀攻保定正定除日本外  
均已允從情勢日危從此擾及東南皆未可定我若背城借一未始非  
策但海無戰艦陸無勁旅製造局多濱江海開戰即爲敵據是有兵無  
械有械無彈一戰不勝終至束手矧彼已合謀我無援助此戰之難也  
俄法一黨英日一黨美最和平德最狠鷙議款則意見各殊言戰則互  
爭利益其勢不能不合而忽合忽分我均受害各國以宋聶各軍勇戰  
知我兵尙可用乃宣言不瓜分似屬可信然俄若全據東三省則德據  
山東英據長江日據閩法據粵勢所必然除美重商務外俄法志在略

地不願通和日英志在干預政權餘則希冀路礦開埠尙願聯和願和者冀遂要挾遂力請回鑾不願和者知回鑾不易可藉口遷延而決裂亦力請回鑾至於償兵費請改政及駐兵都城皆條款所必有之事均不易允此和之難也雖賴兩宮恩澤春間召見各使之妻洋兵入都保護宮禁毫無異辭若趁此時速降悔過求和諭旨飭慶親王照會各使並多頒請和國書於要挾各事委曲遷就和議尙可望成然後力圖自強以謀恢復至釀禍諸臣各國最所切齒雖嚴譴意猶未愜應如何嚴懲或飭諸臣先行回京可以紓洋兵西上之禍伏乞聖裁

由劉坤一電交陝撫轉遞

上諭此次中外啟釁變出非常推其致禍之由實非朝廷本意皆因諸王大臣縱庇拳匪開罪鄰邦以致貽憂宗社乘輿播遷朕固不能不引

咎自責而諸臣無端肇禍亦應各予處分莊親王載勛怡親王溥靜貝勒載灃載瀅均着革去爵職並停俸端郡王載漪著加恩從寬撤去差使交宗人府嚴加議處並議停俸輔國公載瀾左都御史英年著交各該衙門嚴加議處協辦大學士吏部尙書剛毅刑部尙書趙舒翹著交都察院吏部議處以示懲儆朕念祖宗付託之重總欲保全大局不能顧及其他爾諸王大臣謀國不臧咎由自取當爲天下臣民所共諒也

初二日 駐蹕太原府城

大學士軍機大臣奴才榮祿暫護直隸總督布政使奴才覺羅廷雍奏爲恭摺覆陳仰祈聖鑒事竊奴才等於光緒二十六年八月二十四日承准軍機大臣字寄八月十二日奉上諭毓賢奏請派重兵扼守保定

初二日 駐蹕太原府城

大學士軍機大臣奴才榮祿暫護直隸總督布政使奴才覺羅廷雍奏爲恭摺覆陳仰祈聖鑒事竊奴才等於光緒二十六年八月二十四日承准軍機大臣字寄八月十二日奉上諭毓賢奏請派重兵扼守保定

一摺保定關繫直省全局現雖派慶親王奕劻李鴻章等與各國商議一切然敵情叵測仍不得不嚴加防範斷不可稍形疏懈所有良鄉涿州一帶均宜節節布置著榮祿廷雍會商妥籌務臻周密毋稍延誤原摺著鈔給閱看將此諭令知之欽此奴才等跪誦之下欽佩莫名竊維保定省會爲直隸全局所關現值款議尙未開辦毫無把握自不能不嚴加防範伏查奴才榮祿自上月行抵保定即與奴才廷雍妥爲籌商將省防嚴加布置八月十六日奴才榮祿覆奏摺內所稱保定省防原有振遠練軍第十營又將總兵徐得標四營留駐省城並飭總兵夏辛酉六營協同防守而提督呂本元所統淮練十九營已與奴才廷雍商酌飭令分紮保定迤北各要隘以期互相策應先於十三日摺內所稱

漕河北河琉璃河皆有險可憑撥隊分紮即指良鄉定興一帶而言至易州之紫荆關爲西路扼要之地已由奴才廷雍飭營前往駐紮其保定迤西如定州正定獲鹿各處均由奴才榮祿分飭總兵張行志何得彪等節節設防均經奏明在案至於餉械軍裝目前尙足支持此後南省源源籌解奴才榮祿悉令運交保定分別存儲以資接濟兼旬以來合力籌辦防務均有端倪況以省城重地何敢稍涉疏忽茲復欽奉諭旨訓飭周詳奴才等益當妥爲商辦加意嚴防以副聖主廑念畿疆之至意抑奴才等尤有陳者現今情形非肅清內匪無以保邦安民是以奴才廷雍前者曾於遵旨派兵勦辦拳匪摺內聲明河間所屬及滄州一帶已派新授浙江提督呂本元開缺貴州提督梅東益安肅定興涿



州新容白溝河一帶已派署天津鎮徐得標候補游擊范天貴等分路前進剿撫兼施其北路之涑水與易州交界石亭鎮地方尙有匪穴亦不容緩奴才榮祿此次來省復與奴才廷雍商派登州鎮總兵夏辛酉率隊往擊俟此路醜類廓清以後始可謂固省城之藩籬杜外人之口實限於兵力不得不以剿爲防默寓抵制之意至奴才廷雍所募振遠新軍十營當因省北空虛以二營駐紮定興以二營駐紮安肅以一營駐紮漕河鎮以一營駐紮紫荆關以資捍衛其定州至獲鹿一帶現已設局轉運糧餉必藉兵力即派二營駐紮定州居中照料其餘三營分駐省垣左右以固城防奴才榮祿飭武衛中軍補用游擊石光賢三營候補知府吳炳鑫兩營記名提督李成金軍隊四旗分紮新樂定州望

奕劻等奏  
合詞籲懇  
回鑾以固  
根本摺

都各處扼守西路通衢以作省城聲援此就現有兵力布置方今時事萬難安危之機間不容髮奴才等惟有竭盡心力審度事機設法維持大局是否有當謹合詞恭摺覆陳伏乞皇太后皇上聖鑒謹奏光緒二十六年八月二十九日發閏八月初二日奉硃批覽奏已悉即著督飭該統領等加意嚴防毋稍疏懈

上諭鹿傳霖著在軍機大臣上行走

初三日 駐蹕太原府城

和碩慶親王臣奕劻等奏爲合詞籲懇回鑾以固根本而繫人心恭摺瀝陳仰祈聖鑒事竊臣奕劻奉命回京業將到京接晤各使情形先後專摺馳陳在案近日復晤各國使臣該使等尙願邦交均恭請皇太后

皇上聖安深惜此次亂民驟起未能先事預防致使釀成從來未有之奇變現在近畿一帶拳會尙多切請設法剿捕庶免洋兵代辦玉石不分良民亦遭塗炭各等語臣奕劻當因該使等語意近情允其咨囑署直隸總督廷雍迅即查明拳會聚集處所認真遵照迭次諭旨辦理免其再釀巨患於十五日專差齎文行知去後八月二十一日奉到廷寄一道臣奕劻跪讀之下敬悉簡派大學士榮祿來京會商一切臣奕劻得以集思廣益欽感莫名二十二日接李鴻章電稱已於二十一日航海來津因電促其到津後卽日赴京以便開議此臣奕劻近日在京辦理一切之實在情形也連日復與在京各大臣及翰詹科道一再籌思邇來時局艱危和議之難自在聖明洞鑒但默揣各使之意均以鑒與

遠狩一經開議竊恐無所秉承深願迎請皇太后皇上還都尙非藉以要挾別圖譎詐況京內人心尤以聖駕一出無所依歸百萬軍民旁惶若失方今環球權力各不相下然轉因彼此牽制之情迫而爲顧全中國之計若此時聯合各使維繫人心惟有仰乞皇太后皇上上奠宗社下拯臣民即日迴鑾以維大局京中宮廷府庫經列聖締造宅中圖治已立萬世不拔之基若以京城兵事偶蹶久駐行省無論經營儲積瘠土難供萬一敵人合謀逞志據我糧道絕我餉源竊恐天下解體雖百二秦關無能爲禦臣等歷觀往代遷都之失史冊彰彰可考且環球各國通例所派使臣必須駐紮與國國都倘此間和議已成聖駕尙無回京確期恐各使將以移駐爲請於事更多窒礙伏願皇太后皇上聖心

獨斷早日還京並預將駕旋日期明降諭旨布告中外既慰普天依戀之忱亦遂各使就瞻之願臣等不勝戰慄待命之至謹合詞恭摺奏聞伏乞皇太后皇上聖鑒謹奏和碩慶親王臣奕劻東閣大學士臣宗室崑岡吏部尙書臣徐部禮部尙書臣啟秀禮部尙書臣廖壽恆兵部尙書臣宗室敬信刑部尙書臣崇禮工部尙書臣松淮理藩院尙書臣裕德吏部侍郎臣宗室溥善戶部侍郎臣宗室溥良禮部侍郎臣榮惠署禮部侍郎臣阿克丹刑部侍郎臣崇勳刑部侍郎臣景澧工部侍郎臣世續工部侍郎臣李端遇理藩院侍郎臣那桐總管內務府大臣臣文廉內閣學士兼禮部侍郎銜臣宗室壽耆都察院左副都御史臣曾廣鑾大理寺卿臣常明大理寺卿臣王福祥順天府府尹臣王培佑光祿

奕劻等奏  
錄呈各國

寺卿臣郭曾炘太僕寺卿順天府府丞臣陳夔龍通政使司副使臣榮慶大理寺少卿臣宗室溥綱太常寺少卿臣張亨嘉署順天府府丞給事中臣黃均隆翰林院侍講學士臣朱祖謀惲毓鼎內閣侍讀學士臣福敏翰林院侍讀臣朱益藩禮科掌印給事中臣鄭思賀禮科給事中臣王鵬運巡視中城掌山東道監察御史臣陳璧巡視東城掌河南道監察御史臣徐道焜巡視北城掌四川道監察御史臣張兆蘭署巡視南城山東道監察御史臣許祐身掌江南道監察御史臣萬本敦吏部右侍郎順天學政臣張英麟左春坊左庶子臣徐琪光緒二十六年八月二十六日發閏八月初三日奉硃批另有旨

奕劻等片 再正緒摺間接據各國使臣先後來函咸以迎請聖駕早

使臣請早  
回鑾來函  
片

日回鑾以固民心爲詞臣等覘其意旨尙屬懇摯未敢壅於上聞謹將各使來函另單鈔錄恭呈御覽伏乞聖鑒謹奏

照錄比國使臣姚士登八月二十二日來函

逕啟者日前貴親王枉顧本大臣首先答拜而貴親王來京亦係首先願和但李相尙未來京諸大政由貴親王與議即李相到京亦不過如此本大臣諒貴國朝廷今若來京於和局卻屬易辦現今人心荒亂雖令地方平安設若朝廷速臨就易於平安也中國朝廷現在他方故於和局猶豫所有各國政府以及百姓均未能向貴國議及和局者因貴國如今散亂無專主耳所有以上各節希即轉達朝廷並望貴國朝廷自主速臨仍然照常恭敬也專此布達順頌日祉

照錄俄國使臣格爾思八月二十三日來函

逕啟者照得各國所派救脫各使館之軍於既進京之後本大臣加意於助速竣軍事而安撫地方爲維持中俄睦誼所必須之舉是以貴親王晉京深屬歡慰然所不能瞞隱者係欲盡復舊好極願朝廷回京惟爲安撫人心未定之地係屬維難此貴親王自易知悉而定斯民莫逾朝廷回京耳且朝廷被置其於危地之人所環圍駐蹕京外則各國以及華民均想朝廷不以與外國歸復舊好爲善惟欲百方革除各項誤會之處本大臣擬請貴親王將此本大臣之私忱奉達皇太后皇上聖鑒夫接待朝廷必以至敬無所慮擾無庸稍有疑慮之由即以貴親王歷親之事明證所言爲實應一併聲明此布



順頌日祉

照錄英國使臣寶納樂八月二十四日來函

逕啟者竊查各國因救使館以致佔守京師蓋救保使館爲大旨夫使館旣得救護且又得貴親王轉回北京議和則各國公使乃咸生惻隱之心而免塗炭本大臣有所論及而敬陳座右者如貴國皇太后大皇帝亦能回鑾則彼此議和似尤容易貴親王亦知人心疑慮國中平靖較難苟得聖駕早回自當人心平定然皇太后大皇帝遠離事關各外國與本國人民想貴親王自能設法使各外國以及駐華各洋人仍皆優待與前無異也敬請貴親王將以上各節奏明皇太后大皇帝如果回京莫慮各國不行尊敬如前或生異念想貴親

王自到京後一切情形早經洞鑒矣此布順頌爵祺

照錄日本國使臣西德二郎八月二十四日來函

敬啟者本大臣維現在情勢務宜速定事局以重邦交而挽睦誼雖貴王爺奉有全權便宜行事無如龍駕巡幸京中無從設朝是以中外人心終難安堵且遇事奏議往返需日深恐致誤大局因思貴王爺念此時局重艱迅即奏請龍駕旋京俾得各國和局早日成議是爲主要至保護迎駕等事各國自必盡禮而行諒貴王爺躬親閱歷似勿庸過慮也尙希鑑察熟圖本大臣無任翹望之至肅此泐達順頌鈞祉

照錄日斯巴尼亞國使臣葛絡幹八月二十四日來函

敬啟者中華時事大變各國調兵雲集救護使館原係勢不得已自王爺回京之後即與各國公使往來各公使於貴國社稷人民事宜開誠布公之意諒王爺業已洞悉貴國現又簡派王爺及李中堂爲便宜行事全權大臣與各公使商辦一切此次諭旨以及王爺與各公使會晤之語亦足使各國推誠相信但貴國皇太后皇上現離京師彼此商辦一切諸多遲滯非與王爺相處密邇恐更增益時艱本國雖無兵勇前來北京然有兵各國本大臣情願力勸其公使及其統兵大員俟貴國皇太后皇上回京之後必須恭待如禮極盡敬奉之儀請王爺萬勿疑慮特此敬候鈞安

照錄美國使臣康格八月二十五日來函

逕啟者本大臣茲論及北京現時情形係因何故姑置不問所可言者不過因各使館危甚各國派有兵丁來京救護使館迨至各國兵丁進京朝廷已因而遷避以致北京地方現由各國兵丁分段管轄各國所爲第一件特派救援使館之兵旣已辦理成功各使臣均樂意按兵不動足見係因願接待貴親王旋京開商和好一切事宜現於開商此事有所耽延不過因李中堂未抵京本大臣茲有私見特向貴親王言之現在欲商和局頗可易而且速惟必須貴國皇太后皇帝駕旋北京方好定局貴親王必須知現因人心惶惑不知以後情事如何各處地方欲求平安甚屬不易皇太后皇帝旋京人心自然鎮定似較他法更爲妥善是以本大臣擬此辦法貴親王總以將

奕劻等奏  
請降旨表  
明惋惜被  
戕德使及  
日本書記  
官片

此節奏明爲甚善再者皇太后皇帝如旋北京切不必懼各國不行  
善待有所拘束茲有可據者貴親王旋京時各國相待如何定亦必  
待貴國皇太后皇帝無異也特勅即頌日祉

奕劻等片 再泰西公法最重使命遣派使臣駐紮友邦得享優待利  
益是以中國與各國訂立條約皆首列彼此保護使臣之條以示鄭重  
本年五月二十四日德國使臣克林德赴總理衙門會晤行至中途突  
有被鎗擊斃之事現在各國均謂戕害使臣攻擊使館有違公法條約  
並謂德又續派多兵意在報復等語事雖未必確實不得不預爲之防  
現當和局開議之始應請特降諭旨表明惋惜由臣奕劻恭錄行知該  
國使館俾知變起倉猝實係保護不及並非出自朝廷本意庶免責言

又日本使館書記官杉山彬在京城永定門外被害應請一併敘列實於和議有裨理合附片陳請伏乞聖鑒訓示謹奏

上諭慶親王等奏合詞籲懇回鑾並將英俄等使來函呈覽及請旨惋惜德使等各摺片覽所呈各使來函並無德法兩國其爲意見不協可知且城門街道此時仍由洋兵看管該王大臣等遽請回鑾於事體未爲妥協現在李鴻章計已到京著慶親王奕劻會同妥商體察各國情形究竟有無實在把握慎之又慎再行具奏李鴻章沁電所請各節均已照行應即據理剖陳一面將和局迅速開議隨時報聞聽候酌量進止將此諭令知之

上諭大德國駐京使臣克林德前被兵戕害朕追念之餘倍加軫惜著

派大學士崑岡卽日前往奠醊靈柩回國時南北洋大臣派員照料抵本國時著再賜祭一壇派兵部左侍郎呂海寰前往奠醊

致德國皇憫惜克林德國書

上諭大日本國駐京使館書記生杉山彬被害情事前經降旨緝匪懲辦因念該書記生在使館當差理應一律保護乃因事出倉猝遽爾被戕實深軫惜著派禮部右侍郎那桐前往致祭並賞給祭葬銀五千兩靈柩回抵本國時著內閣侍讀學士李盛鐸派參贊官一員再行奠醊用示篤念邦交憫惜不忘之至意

致日本國皇國書 大清國大皇帝問大日本國大皇帝好前因貴國書記生杉山彬在永定門外以口舌細故被戕深恐有乖鄰誼當卽降

致日本國  
皇憫惜書  
杉山彬  
並派那

旨緝匪懲辦追念該書記生被戕情事彌深惋惜本日已明降諭旨派禮部右侍郎那桐前往致祭並賞祭葬銀五千兩靈柩回抵貴國時令內閣侍讀學士李盛鐸派參贊官一員再行前往奠醊用示朕惋惜不忘之意貴國與中國文字同洲素敦和誼此次中國開罪友邦蒙大皇帝極力維持感激之忱曷有既極還望諄勸各國早定和議則保全東方大局裨益實多朕不勝禱切盼切之至

致英國皇請先執牛耳向各國婉商議約國書

致美國總統請設法勸令各國議約國書

致法國總統請幫同勸令各國議約國書

派駐俄使臣工部左侍郎楊儒就近親遞國書致謝俄主先允撤兵厚



意

岑春煊奏振起綱維以支危局謹陳管見四條摺

瑞洵奏籌墊辦理蒙團各項經費請速撥專款摺

上諭寄瑞洵覽奏悉辦理地方公事必須經費有著方可舉行現在國事如此戶部支絀萬狀斷無鉅款可撥科布多邊防事宜該大臣視力所能爲悉心妥辦勿徒紛擾

上諭爲政首在得人著各直省督撫切實保薦人才不拘資格並考察堪勝專閫之任者隨時奏聞候旨簡用

上諭陶模著調補兩廣總督陝甘總督著魏光燾補授岑春煊著補授陝西巡撫甘肅布政使著升允補授沈家本著補山西按察使

上諭毓賢著即開缺山西巡撫著錫良補授張曾敳著調補湖南布政使福建布政使著周蓮補授吳重熹補授福建按察使

旨電劉坤一蘇省截存海運漕糧現陝西以旱災奏請賑濟著設法取道漢口襄陽運解

初四日 駐蹕太原府城

上諭此次西幸長安武衛前後兩軍除馬玉崑酌帶隨扈外其餘各營均歸宋慶節制自居庸南口及宣化大同一路各宜安設地營扼要駐紮該提督駐守太原居中調度此路緊要不可疏忽

初五日 駐蹕太原府城

戶部尚書敬信奏擬借洋款一百萬兩以應留京辦事及慶親王用款

急需摺奉硃批著儘前提京餉百萬兩支銷毋庸挪借洋款

上諭寄錫良毓賢現已開缺所有固關一帶駐紮防營着交錫良接統

### 初六日 駐蹕太原府城

上諭朕幸山西倏忽兩旬警蹕所臨千乘萬騎晉省荒旱供億維艱朕心深爲惄然兼以省垣電報消息阻滯未免貽誤軍情現定於本月初八日巡幸陝西所有扈從人等身兼要差者隨駕前往馬玉崑一軍著於初八日凌晨拔隊其餘執事人員著於初十日隨後成行

慶親王奕劻電奏 接駐俄使臣楊儒電晤俄戶部外部聲稱俄允交還東三省請派人接收等語現在延茂壽山均已自盡增祺長順未知存亡該二員尙明白曉事請飭李鴻章查明派令接收奉吉兩省事務

奕劻奏俄  
允交還東  
三省請派  
增祺長順  
接收電

摺

上諭寄李鴻章現在俄允交還東三省著探明增祺長順消息諭令暫管接收奉吉兩省事宜

旨電慶親王李鴻章太原荒歉供億維艱兼之山徑崎嶇電報遲誤本日降旨西幸長安於初八日啟行該親王等務將和局速爲議結俾可早日北還將來取道河南較爲安適寄廷雍轉

錫良宋慶馬玉崑電奏 探得洋兵分據保定文報不通直屬皆遵李鴻章密函派員迎接洋官撤退防兵獲鹿紳民亦堅請官兵撤退免致塗炭所有防軍現均移紮井陘固關一帶聯軍若來晉省深恐再蹈覆轍請旨遵行

上諭寄錫良等現方議和不宜輕開邊釁然亦不可令其長驅直入須嚴防直晉交界毋令深入險要

旨電李鴻章現方議和而洋兵深入不已該大學士當亟與各使商量力阻聯軍西進

旨寄劉坤一張之洞清江轉運局著移設漢口以就利便

初七日 夜行宮失慎焚坐落三間

宋慶馬玉崑電奏 探報保定防兵軍械均被洋人收去所有駐紮平定州三營是否應先撤退請旨遵行

張之洞于蔭霖電奏 康有爲黨羽謀逆於長江一帶分散富有票勾結多人現拿獲渠魁訊明正法

色楞額奏請留總兵程允和一軍駐防古北口摺

旨寄宋慶等程允和著率所部四營迅赴太原歸宋慶節制古北口地當險要著色楞額就現有各營認真防守

初八日 啓鑾巡幸陝西行八十里駐蹕徐溝縣城

伊犁將軍長庚奏統籌戰備摺

軍機大臣王文韶代遞總稅務司赫德電報一件未發下

初九日 行九十里駐蹕祁縣城

岑春煊奏陝西災重襄河運艱請飭由道口鎮運解摺

初十日 行五十里駐蹕平遙縣城

旨電劉坤一張之洞江北漕糧十四萬餘石前已撥給山西現既運至

德州著錫良派兵接遞運至陝西至清江轉運局所撥直隸賑米十萬石仍著該督飭令憚祖祁運至德州由直隸總督派員接運其餘十萬石及本屆截存海運漕糧二十餘萬石即著一併取道漢口改由襄河運赴行在

王文韶擬覆赫德電信一件呈覽未發下

榮祿奏遵旨裁營騰餉以資董軍添募勇營摺

又奏各國保護接待之事尙未議妥現暫駐保定俟李鴻章到津晤商各使定妥後再行進京片

兩江總督劉坤一湖廣總督張之洞福州將軍善聯山東巡撫袁世凱奏爲任將不宜再誤衛軍宜加慎選以安兩宮而定危局事竊臣等伏

劉坤一等奏任將不宜再誤衛軍宜加慎

選以定危  
局摺

讀七月二十六日上諭有云庶幾不遠而復天心之悔禍可期仰見聖明虛懷克己鑒於前事之失力圖挽救之方曷勝欽悚謹按周易曰不遠復無祇悔元吉又曰迷復凶蓋凡事措置失宜致生災患早思變計則吉終於不悟則凶此久已在聖諭鑒照之中者也竊維此次肇釁誤國之由董福祥不能辭咎平日大言欺人自謂足以敵洋人五月間首戕洋官六月以後專攻使館其軍半與拳匪勾通拳匪焚殺董軍劫掠狼狽相倚殘毒京城既不聽大學士榮祿節制並不遵諭旨調遣及外患日急大沽天津北倉諸軍苦戰數旬傷亡殆盡河西務諸軍雖然潰敗究屬見敵惟此欺罔跋扈之董軍並未列隊迎截出城後卽大掠滿載驅之而西京畿人民言之切齒聞該軍隨扈太原尙有二十餘營又



聞車駕因欲幸陝特調馬安良一軍此必董福祥乘國家危急之時妄言回軍能戰冀以廣樹黨羽挾制朝廷查回性很鷙向不馴良董福祥所部半係回兵馬安良所部盡係回兵西安回民素多甘省向係回藪猶憶五月三十日諭旨有禍起肘腋朝廷苦衷等諭臣等至今思之猶爲痛心今若乘輿幸陝而又多調回軍養虎自衛誠恐乘輿肘腋之間無非回人將來朝廷一切措置皆不能徑行其意是在京爲拳匪所挾制出京又爲回軍所把持誠如八月十五日諭旨所云一誤而再誤矣蓋董福祥自知罪惡多端不僅爲各國所深仇實爲天下臣民所共憤以故增兵自衛便其私圖似此欺罔肇禍始終怙非絕不爲大清之宗社計不爲兩宮之安危計若不及早慎防誠恐後患難測此臣等所以

焦灼急迫不敢不披瀝直陳於皇太后皇上之前者也竊謂洋兵未撤則回鑾實爲險著若回軍布滿左右則幸陝尤屬危機總之無論駐蹕何處扈衛諸軍宜專選忠純篤實之將可否請旨將董福祥交部議處飭回本任罷其兵柄所部各營令宋慶馬玉崑岑春煊錫良四人分統之分爲四軍其勢自戢部署略定以後分別撤留能守軍律者留之桀驁擾民者裁之其馬安良一軍尤懇不再徵調兩宮旣安則天下臣民之心皆安然後廟謨默運可以熟計通籌臣等合詞迫切密陳謹電由護陝西撫臣端方繕摺馳遞謹奏光緒二十六年閏八月初十日

十一日 行八十里駐蹕介休縣城

岑春煊奏陝西歲旱請購糧接濟摺

呂海寰等  
奏請誅禍  
首速籌和  
議電

上諭介休縣義安村民人郭敦源自稱義和團衣服詭異衝犯儀仗著  
即行正法介休縣知縣陳日稔防護不力著即行革職

旨寄榮祿武衛中軍俟裁併就緒後該大學士著仍駐守保陽督飭各  
營悉心辦理各國款議與奕劻李鴻章儘可函商不必定須進京

慶親王奕劻大學士李鴻章電奏 各國使臣僉請懲辦禍首尤恨董  
福祥毓賢二人以爲教民被其戕害不少不先殺此二人不能開議必  
欲請旨正法現雖力與磋磨萬難就緒伏乞聖裁施行

出使大臣呂海寰羅豐祿楊儒伍廷芳裕庚李盛鐸電奏 爲時事危  
迫宜速籌和議以挽危局而杜後患事現在各國推原禍始咸謂棄信  
絕好誤國殃民於徐桐李秉衡毓賢剛毅趙舒翹端王載瀾董福祥除

已死者免究外若不嚴辦未便議和德挾殺使之嫌通告各國須交罪人方始開議惟美國覆稱須由中國自行懲處餘國均允照辦蓋將並力勒索期於必行竊意德統帥現已到華各國之軍統歸節制意在非開議不停兵非懲惡不開議曠日持久不特襲據都城直將遍擾北省牽動東南甚或大舉西行外患不休內變將作誠可惴惴伏願皇太后皇上念祖宗締造之艱慰天下臣民之望凡屬罪首立予嚴懲明白曉諭申明非由內意則事或可解否則彼族挾其兵勢必欲得而甘心彼時國體全虧覆蓋不及何若我先定罪分別辦理與其受制於人授彼駢誅之柄何如黜陟自上存我自主之權謹合辭電奏伏乞聖斷施行

由劉坤一電交陝撫轉遞

楊儒奏俄  
外部言如  
真心和好  
必須回鑾  
電

錫良奏正定洋兵時增時減是否西行尙難測度摺

楊儒電奏 恭奉諭旨仰見聖主引咎懲罪顧重邦交叠次催詢俄外部請及時排解迅速開議以副國書敬託之意據外部云中朝如真心和好必須聖駕還宮誠心修好干戈待息商議不難儒數日來微窺各國之意均欲保和不欲生事俄允始終如一近日朝政中外感動推誠布公正可早圖了事指日還京必不驚犯聖駕若果西幸將疑我別有隱謀非特議結無期且恐激成變局或并力西向直逼咸陽或蔓延南疆分據海岸其爲禍何堪設想伏乞熟思審處速罷西遷之議大局幸甚

十二日 駐蹕介休縣城

李鴻章奏  
美允開議  
仍請回鑾  
俄無佔地  
之意電

上諭寄升允著趕緊派妥慎委員勸阻洋兵勿更前進

電報西局電稟海路已通情形說略一件

李鴻章電奏 前奉罪已諭旨三道中外官民同聲悅服國事冀有轉機適俄使來津立即恭錄屬轉電該國政府美允開議仍請回鑾鴻擬十一進京與各使敘議留洋兵二百護館餘悉遣還昨俄吳王克託到滬云有俄太后致皇太后國書密函云要面遞請旨據云俄無佔地之意伊奉俄主諭來幫助和款鴻請其赴京相商再各使以圍攻使館時有武衛中軍及甘軍在事深嫌榮祿以武衛中軍係榮祿所統不肯接待保護恐有險可否召榮祿赴行在不必再駐保定

十三日 行一百里駐蹕霍州城

上諭寄榮祿著卽前來行在入直辦事所有駐紮保定一帶之武衛中軍本日已有旨歸李鴻章節制調遣李鴻章未到京以前著交廷雍暫行接收統帶矣

張之洞電奏 探聞聯軍到唐官屯勦辦拳匪德國兵頭爲首領其地距津僅百里又聞將分兵據德州犯保定請飭嚴防

旨寄袁世凱廷雍據張之洞蒸電奏稱俄德等洋兵六萬餘到距津百餘里之唐官屯一擬往紮德州一擬進窺保定等語所奏情形是否確實著袁世凱迅速查明電覆德州爲運河要路保定關繫直省全局難保不爲外人覬覦該撫與廷雍務當各守地方密籌防範勿稍疏誤直

李鴻章奏  
報遵旨  
在津接印  
日期摺

隸山東境內倘有洋兵去向蹤跡併著袁世凱廷雍飭屬偵探確情卽由各該州縣用六百里排遞徑報行在軍機處其通電處卽用電報以期消息靈通毋任刻延

### 十四日 行五十里駐蹕趙城縣城

欽差大臣大學士直隸總督一等伯臣李鴻章奏爲遵旨在津接印恭摺叩謝天恩仰祈聖鑒事竊臣前准軍機大臣字寄光緒二十六年六月十六日奉上諭李鴻章前已降旨調補直隸總督著無分水陸兼程來京等因欽此又於八月十八日准署陝西撫臣端方轉准行在軍機處寄諭該大學士應卽馳赴天津先行接印各等因欽此臣正在滬布置起程惟天津進口須有各國保護接待乃可暢行無阻借乘俄艦易



啟猜疑俄國既有保護之言是以逕坐招商輪船於八月二十五日抵  
津維時道路梗阻齎印艱虞與護督臣廷雍往返函商始於閏八月初  
八日准該護督飭委開州協副將鄭國俊等將欽差大臣暨直隸總督  
關防鹽政印信一併齎送前來臣卽於行次恭設香案望闕叩頭祇領  
任事伏念臣以衰年膺茲艱鉅當國步艱難之會正臣下効命之時現  
雖敵騎縱橫未允停戰衆情叵測未易撤兵臣惟有矢以忠誠布昭信  
義因勢利導委曲調停仍督飭文武勦除內匪撫輯殘黎庶期畿甸肅  
清苞桑永固以冀仰答高厚恩慈於萬一除俟料理略有端倪卽日入  
都會商慶親王與各國使臣開議另再陳奏外所有微臣接篆日期理  
合繕摺由驛具奏恭謝天恩伏乞皇太后皇上聖鑒謹奏光緒二十六

李鴻章奏  
津局庫銀  
鎗礮被洋  
人擄掠罄  
盡片

年閏八月初九日發十四日奉硃批知道了

李鴻章片 再臣剋日赴京所有地方日行事件應交藩司代印代行其洋務軍務關緊要者包封遞行次核辦各路拳匪橫行及教民聚衆報復應責成藩司廷雍督飭各地方官會同營勇分投勦辦解散彈壓署直隸提督呂本元前貴州提督梅東益辦事均甚得力已檄令會督各營認真勦撫以期早就肅清免致外人藉口惟是淮練各軍疊經津沽血戰傷殘之餘六月以後未得放饟饑困堪憐天津司道局各庫積存數百萬兩全被洋兵土匪擄掠罄盡各機器製造局及軍械局鎗礮子藥儘數被擄百無一存臣實無從措手焦急莫名謹據實附片瀝陳伏乞聖鑒謹奏奉硃批知道了仍著督飭藩司設法籌畫勉爲其難

以固畿疆

十五日 駐蹕趙城縣城

程文炳奏督陝西上情形並先赴潼關一帶駐紮摺

劉坤一張之洞電信 傳聞聯軍將赴津京以南尋剿拳匪並有往山

東地方之說查自拳匪作亂袁中丞首先嚴禁拳匪入境保護租界及

教士教民最爲出力既剿東境拳匪又派兵越境剿直邊拳匪共誅戮

數千人境內現均平靖在東各國洋商教士及他處避亂往東者此次

未傷一人實爲東北各省所未有想爲各國官民所共諒袁中丞前又

屢次奏請剿匪復又迭次聯名奏請救使並請懲首禍此皆山東顧全

大局力阻戰事之明證朝廷今已極意願和雖未開議漸有轉機而山

劉坤一等  
致各領電  
請各領電  
各外部勸  
聯軍母往  
魯境電

東境內實無匪可剿即偶有蠢動東省兵力足可彈壓各國出兵以剿匪救使爲名素不仇視山東似無侵入東境之理萬一傳聞非虛恐宵小乘間竊發地方糜爛必將甚於直隸非數十年不克復元與各國利益亦大有損擬請各總領事電達各欽使及各外部顧念山東無辜生靈保全中外利益不應爲直境拳匪所累致受兵火之禍共持公議設法勸阻請聯軍毋往東境則非獨山東數百萬良民心感各國之大義即南方各省聞之亦曉然共知各國並無遷怒無辜之舉和局一定嫌怨盡捐豈非盛美坤一之洞因山東保護商教與長江各省事同一律故不能坐視不言希電覆

十六日 行九十里駐蹕平陽府城

榮祿奏入  
駐保定於  
大局有礙  
擬赴行在  
摺

魏光燾奏提督鄧增帶兵西上請撥的餉摺

又奏甘軍潰掠情形並董福祥馬安良所部潰勇太多爲患片

十七日 行六十里駐蹕太平縣之史村驛

奴才榮祿奏爲恭摺密陳仰祈聖鑒事竊奴才於本月初八日曾將在保定專候李鴻章信來如果各國俱認保護再行設法入都以免另生枝節附片奏明在案茲於十三日准李鴻章專派易州直隸知州寶以筠齋來密函稱頃據前署日本公使內田康哉由京來稱各國使臣咸云圍攻使館卽奴才所部各營議定不准接待前此日本外部不知細情是以商請奏派茲既有此議非一國所敢保護應請暫緩來津等語並函稱伊等既不肯保護接待若遽行入都恐有意外之險又附寄新

聞紙一條中有不准奴才與奕劻李鴻章會議之語並據寶以筠面述李鴻章所言各使旣以圍攻使館係奴才所部各營自必不肯保護若勉強前進其險莫測且聞德國新來統兵瓦帥以德使被戕深爲懷恨現在不肯與李鴻章往來會晤其心殊爲叵測並令告知奴才不宜駐紮保定以避其鋒緣津京密邇保定彼或藉口剿匪爲名抵保勢必與奴才爲難且刻間與各國正欲開議之際尤不能以兵相拒致啟各國疑忌是久駐保定不惟無益且恐事機於大局有礙仍以馳赴行在爲是各等語奴才伏念變起非常不能補救萬一上紆宥旰之憂實屬慚悚無地今各使以圍攻使館之嫌不肯保護接待其心叵測在奴才一死不足惜特恐因奴才而掣動全局貽誤殊非淺鮮反覆思維更證以

李鴻章之言既不能久居保定又不能前往京津惟有趨謁行在叩觀天顏稍申犬馬戀主之忱奴才具有天良非敢稍存規避實以事當萬難關繫重大與其貽患於將來不如見機於此日奴才於拜摺後擬即出省取道正定及彰德衛輝一帶由豫入秦迎摺西上是否有當謹恭摺密陳伏乞皇太后皇上聖鑒訓示再附黏李鴻章寄來新聞紙一條敬呈御覽合併陳明謹奏光緒二十六年閏八月十四日發十七日奉硃批前已有旨令該大學士前赴行在入直辦事矣

署雲貴總督丁振鐸奏滇省南防西防均甚喫緊請飭四川湖北廣東各省接濟軍械摺

旨電劉坤一張之洞丁振鐸滇省毗連緬越現值多事之秋尤不可令

生他變著丁振鐸督率文武嚴密防堵劉坤一張之洞設法接濟餉械萬勿漠視

江西巡撫松壽奏聖駕西巡敬陳轉運防兵事宜摺

又奏撥款解清江轉運局以資輸輓片

太常寺少卿督辦電報大臣盛宣懷電奏 廣東惠州土匪嘯聚至萬餘人均插康有爲旗號請飭該省督撫認真剿滅無令勾結洋人爲患甚巨

十八日 行八十里駐蹕曲沃縣之侯馬驛

岑春煊奏請將潼關各軍分路扼紮勿妨陝省民食摺

旨寄程文炳所有江西安徽入衛各軍均駐潼關陝省荒歉民食維艱



劉坤一等奏爲偏安必不可成請  
降旨事定回京以安大局摺

著程文炳詳查關外情形將已到續到各軍分紮靈寶陝州河洛一帶  
庶兵民兩便

### 十九日 行七十里駐蹕聞喜縣城

南洋大臣兩江總督臣劉坤一等奏爲偏安必不可成京師必不可棄  
籲懇明旨事定回京以定人心而安大局恭摺瀝陳仰祈聖鑒事竊自  
拳匪肇亂構釁列邦津京相繼失陷遼東亦多失守以致宗社震動乘  
輿播遷薄海臣民皇皇失措莫不謂拳黨釀禍貽誤我國家疾首痛心  
同切憂憤迨疊奉明詔車駕暫幸太原剿治匪徒議及親貴仰見我皇  
太后皇上前者之苦衷今者之明斷雖外人尙未滿意然已漸有轉機  
天下士庶莫不欽仰感動鼓舞歡呼方冀畿輔廓清指日回鑾上慰九

廟在天之靈下遂億兆蒼生之望日昨恭讀電傳本月初六日諭旨現定於閏八月初八日啟鑾西幸長安等因欽此臣等至愚鰓鰓過慮有不得不直陳於我皇太后皇上之前者伏查自古國家多難之時亦有遷都之舉然必須敵人不能懸軍深入既深入亦不能持久我始能立國圖存今日聯軍謀堅勢衆實與古來不同況陝西地方自宋金元明至同治以來屢經兵燹商稀民瘠古稱天府今非雄都又與甘肅爲鄰素爲回藪較之京師難云完善即就目前言之各國方以新勝之師聯合圖進我能往寇亦能往不畏數萬里之海豈畏二千里之陸蓋山川之險未可漫恃即偏安之局不可幸成也且京師根本重地四方所拱極而朝宗者也宗廟宮闕列祖列宗之神靈所式憑者也二百餘年來

邦基固矣一旦棄之不特失臣民之望度亦非聖心所安前聞各國曾請退兵迎鑾不佔土地無論所請果否出於至誠正可藉回鑾之說以速其撤兵之議倘西幸逾遠是折各國之請而阻就款之忱萬一激變宗旨洋兵不撤京畿從此淪胥矣遼東不復陵寢從此阻隔矣一國變計各國爭先外而沿江沿海處處侵佔內而奸宄生心紛紛擾亂瓜分之勢成糜爛之禍亟人心愈搖餉源愈竭運道愈難而此時朝廷徒局促偏安爲閉關自守之計夫以偏僻凋敝之秦隴供萬乘百官之資糧久將不給以屢次挫失之兵械抗合從連衡之強國勢必難支存亡關鍵實在於此臣等萬死奚足補救伏祈皇太后皇上追念列祖列宗創垂之艱難俯恤滿洲八旗生齒之蕃衍外順各國迎駕之情內慰臣庶

懇闕之心擬請睿裁收回幸陝成命若乘輿已發距陝伊邇勢難折回亦祈明降諭旨布告天下具言此次幸陝亦係暫計俟畿輔稍定即行回鑾並由京簡派王大臣致祭宗廟恭謁兩陵示天下以朝廷不忘宗廟陵寢之重斷無終不回鑾之理一面飭令全權大臣等婉告各國使臣果其退兵示以必返庶足以定人心而安大局臣等愚慮所及不敢不昧死瀝陳謹合詞繕摺具奏伏祈皇太后皇上聖鑒訓示謹奏護理江蘇巡撫聶緝縈浙江巡撫劉樹堂湖北巡撫于蔭霖署兩廣總督德壽閩浙總督許應騫湖廣總督張之洞杭州將軍常恩成都將軍綽哈佈廣州將軍壽蔭署福州將軍善聯四川總督奎俊陝甘總督魏光燾山東巡撫袁世凱湖南巡撫俞廉三安徽巡撫王之春大理寺少卿盛

宣懷光緒二十六年閏八月十七日發十九日奉上諭寄劉坤一等據  
劉坤一等合詞籲懇回鑾並先行宣示回鑾日期各摺片均悉此次拳  
教紛爭勦撫兩難以致啟釁鄰邦震驚宮闕朕奉慈輿於鎗林彈雨之  
中倉皇西幸艱苦備嘗一切危險情形有爲該督等所不忍聞者朕馭  
下無方業經引咎自責並將辦理不善之王大臣分別重懲原欲和議  
速定早日回鑾以安宗社而定人心豈有甘就偏安輕棄京師之理惟  
現在奕劻李鴻章在京與各國使臣尙未開議洋兵在京分段據守即  
來往官民尙難自便若遽議回鑾試問是何景象但使各國與中國真  
心和好不奪我自主之權勿強我以必不能行之事一有定議自當即  
日降旨定期回鑾至目前巡幸長安原係暫時駐蹕前旨已明白宣示

劉坤一等  
奏陝省拒  
敵甚難不  
宜遷都片

凡此不得已之苦衷當爲天下臣民所共諒豈該督等老成謀國尙未能仰體及此耶此中機括朕籌之已熟該督等惟當謹守封疆預籌接濟朕實有厚望焉

繕交陝撫發電

劉坤一等片 再接使俄大臣楊儒江電近外部之語曰勢必大舉西向恐未定咸陽之居又將稅蘭州之駕等語臣等所聞各國議論大率皆同今日幸陝之舉議者必以爲秦中奧區遠於海口又有黃河潼關爲限險隘可守敵來較難拒敵較易不知古今兵事實有不同八國環攻與一國構釁又不同今日戰鬪必憑鎗力守禦須憑礮力潼關同州等處之黃河僅寬三四里愈上愈狹外國陸路行營快礮七生口徑者可擊六七里八九生口徑用馬拖運者可擊七八里新式長田雞礮可

隔山遙擊數里中國皆無之僅憑土礮小洋礮豈能守河守關各省鎗少彈缺自造無多假使敵兵深入中原運陝必然梗阻不過數戰彈子即罄雖有忠義軍民徒手亦難擊敵蓋一國則深入難八國則接濟易此陝省拒敵之難也又查外洋通例凡係有和約之國必駐公使若其國爲公使所不能駐者卽不視爲與國不立和約即使遷都陝西各國別無疑議亦必各遣公使來陝駐劄經此次變故以後使館必派洋兵保護距海愈遠洋兵愈多且山西河南直隸一路必節節皆駐重兵是無論遷都何處必有使館洋兵徒使中原數千里皆爲洋兵盤據此陝省遷都之難也總之陪都之計全在平日經營若戰敗以後則敵人必有責言矣守險遠海亦禦外之一策若海口旣已屬人內地素無守具

劉坤一等  
奏恐各國  
分佔要地  
停戰無日  
仍請明降  
諭旨片

則險者失其險矣各國併力先擾各省彼有接濟之使我無持久之力  
腹背受敵跋前疐後則遠者失其遠矣此須俟事定以後從容籌之遇  
一國生釁之時必先結援數國移蹕陪都軍械充足礮臺周密再行開  
戰最爲要著然非所論於此時也以上各情恐議者或未詳考不敢不  
據實上陳以備朝廷裁度謹合詞附片奏陳伏祈聖鑒謹奏

劉坤一等片 再臣等正會商電奏間欽奉本月初七日諭旨太原荒  
歉供億維艱且電報不通輾轉延誤不得已西幸長安等因欽此仰見  
天心仁愛體念民生並以時局急迫深慮文件或有遲誤故爲此不得  
已之舉是駐蹕長安可暫不可久已在聖明洞鑒之中顧臣等總總過  
慮者則以宗社爲重深恐各國以自棄京城爲言變其宗旨分佔要地



奕劻奏各  
國陸續撤  
兵及京城  
近日情形  
摺

西遼大事記卷二  
三十一  
料附刊之一  
停戰無日開議無期大局不可收拾仍懇俯如臣等所請明降諭旨以  
慰臣庶之心以遂各國之望謹附片具陳伏祈聖鑒謹奏

二十日 行七十里駐蹕聞喜縣城

奴才奕劻奏爲各國陸續撤兵及京城近日各情形恭摺具陳仰祈聖  
鑒事竊奴才於光緒二十六年八月二十六日將籲懇迴鑾各情馳陳  
在案旋於八月三十日由護直隸總督廷雍遞到八月二十四日欽奉  
上諭李鴻章電奏請明降諭旨等語俄兵先撤雖有此言尙未見諸實  
事亦斷無回鑾後再行開議之理所請窒礙難行惟俄兵如果先撤該  
王自可援以爲詞勸各國一律撤兵著即體察情形速籌辦理等因欽  
此仰見皇太后皇上保全宗社力拯人民之至意跪誦之餘曷勝欽悚

奴才伏查此次洋兵進京以英俄日本之兵爲多昨於初三日與俄使格爾思會晤據稱該國來兵共一萬二千人現已撤去一萬一千人祇留一千人保其使館並彈壓暫駐地方復經奴才與各國商議令其撤兵美國當即應允亦祇留兵千人保其使署日本現亦定期撤兵酌留四千餘其餘各國來兵不多一時未能撤退大內各處前經各國派兵駐衛各門力爲保護雖有洋人進內瞻仰而宮廷殿宇穩固如常惟內廷主位暨現有總管首領太監等二百餘人西苑現有太監等十餘人食指浩繁需米甚夥現與日本兵官籌商先由官三倉及恩豐倉存米內暫爲撥用此外京通各倉雖有存儲均爲各國所據將來能否交還殊無把握其各衙門官員暨各旗營弁兵匠役人等瞬屆天寒必須設

法籌給俸薪錢糧用資衣食而戶部不戒於火銀庫存款蕩然各衙署積蓄公項亦皆被掠一空京內無款可籌茲擬由奴才電致各省督撫於應解本年京餉設法湊解赴京用資接濟合無仰懇天恩飭下各省將軍督撫遵照辦理實於根本重地大有裨益城內居住軍民逃散者已陸續遷回各國駐守洋兵除撤退外餘亦較前安靜堪以仰慰宸廑奴才受恩深重當此國事艱難萬不敢存因循諉卸之見昨准李鴻章電稱聞德使不日來津俟與晤面後趕即赴京除由奴才再爲電催外理合謹將京內近日各情形恭摺具陳伏乞皇太后皇上聖鑒謹奏光緒二十六年閏八月初十日發二十日奉硃批另有旨

奕劻片 再正繕摺間於閏八月初七日准軍機大臣函交初二日奉

電已分別  
知照英法  
等國請併  
予國電片

諭旨二道廷寄一件致俄國德國國電二道又於初八日准軍機大臣  
字寄初三日欽奉上諭一道同日內閣奉上諭二道致日本國國電一  
道先後由護直隸總督廷雍飛遞前來奴才跪誦之餘仰見皇太后皇  
上懲勸兼施經權互用之至意惟此次變亂肇自團匪各國於縱庇之  
王大臣仇視甚深是以出使大臣呂海寰來電謂德廷已電各國政府  
非先將該王大臣等交出不能開議現雖予以處分誠可稍有轉機惟  
各國堅執一詞恐不免尙有爭論容奴才與李鴻章體察各國實在情  
形設法排解隨時陳奏除由奴才將奉到嚴議諸王貝勒大臣等諭旨  
分咨各該衙門欽遵辦理並照會各國使臣外至蒙恩賜奠德國使臣  
克林德日本國書記生杉山彬一節已函知德國參贊貝勒威日本國

使臣西德二郎敬謹遵照暨知會大學士崑岡禮部右侍郎那桐擇日前往致奠由該大學士等再行詳細覆奏奴才愚以爲外交之道不宜略有重輕此次德國日本國國電所以慰其使臣書記生之亡俄國國電所以答其撤兵之早朝廷權衡至當洞燭無遺惟英法美義大利各國甚願顧全邦交其兵進京以來並未大肆燒殺美國現議撤兵當此開議之先可否一併予以國電以示維繫之處出自聖裁所有欽奉諭旨分別知照各緣由理合附片具陳再大學士李鴻章現在尙未到京合併聲明伏乞聖鑒謹奏

奕劻片 再前因英俄美日比暨日本各國均函請皇太后皇上迴鑾業經奴才將來函錄呈御覽在案近日又據德義法國駐使一併函請

奕劻奏  
義法駐使  
一併函請  
回鑾錄呈

來函片

前因理合附片照錄並呈御覽伏乞聖鑒謹奏奉硃批知道了

照錄德國署使臣貝勒威八月二十八日來函

敬啟者近聞各國公使欲請鑾駕回京已函致王爺懇祈代奏按貴國現在情形王爺既來京和議據本大臣之見將來彼此會商欲使和局易成非鑾駕回京不可至於貴國皇太后大皇帝及其忠心爲國之臣回京居住可保恭待如禮決無意外之虞再本國新任公使男爵司瓦鎮定不久即可到京特此敬候爵安

照錄義國使臣薩爾瓦格八月三十日來函

敬啟者前與王爺會晤暢談一切按現在大局尙有不能不再陳者至此次大變之故現可不必追究今因各國調兵前來佔踞京師致

使貴國皇太后皇上遠離不知調兵前來係爲救護使館教士洋商以及保存各處財產之意其在京所有洋人免被華兵屠戮者實因大衆盡力防守直至救兵前來而使館人等得以至今猶存此乃貴國之幸各使館均旣無恙各國亦皆息兵願免再事爭戰又聞王爺回京本大臣不勝欣幸日前會晤時王爺曾云俟李中堂到京卽可議和等語李中堂所擬議和之事固不得知本國能否照允亦難預定本大臣欲於此時勸王爺即請鑾駕回京以便將來商議經久和局易於訂定況現在京師人心惶惑不知嗣後局勢如何非皇太后皇上回京人心難安大局難定諒王爺業已見及其尤可慮者皇太后皇上遠離京師原班大臣尙在左右殺害洋人之心仍不稍泯王

爺雖盡心力議和而中外猶然共知此後待外國馭萬民仍不能稍改也是以本大臣擬請王爺力主鑾駕回京之議實爲貴國利益起見至於回京之後各國亦必恭待如禮決無意外之虞此可無須疑慮特此敬候爵安

照錄法國使臣畢盛閏八月初十日來函

敬啟者本大臣維現在情勢務宜速定事局以重邦交而挽睦誼雖貴王爺奉有全權便宜行事無如龍駕巡幸京中無從設朝是以中外人心終難安堵且遇事奏議往返需日深恐致誤大局因思貴王爺念此時局重艱迅即奏請龍駕旋京俾得各國和局早日成議是爲至要至保護迎駕等事各國自必盡禮而行諒貴王爺躬親閱歷



似勿庸過慮也尙希鑒察熟圖本大臣勿任翹望之至順頌鈞祉

上諭據奕劻奏近日京城大概情形並照錄各國來函呈覽各摺片所請一體予以國電之處已照擬辦理矣在京各衙門官員暨各旗營弁兵人等所需俸薪錢糧自應設法籌給卽著李鴻章將各近省應解京餉趕緊催提應用並准其由東南各省京餉過直隸河南境時奏明酌量截留以濟要需李鴻章計已到京多日該親王務當會商妥籌將毋奪我自主之權勿強我以必不可行之事預爲計及隨機因應保全大局是所厚望將此由六百里諭令知之

奕劻片 再此次和議事宜辦理最爲棘手必須京外聯爲一氣乃能相與有成查兩江總督劉坤一湖廣總督張之洞久任封圻威望夙著

奕劻奏請  
界劉坤一  
張之洞全  
權之任電

於沿江沿海交涉情形既甚熟悉而英與日本尤願與之共事合無仰懇天恩畀以全權之任與奴才等電商和議條款事宜似與大局不無裨益是否有當理合附片具陳伏乞聖鑒謹奏

上諭慶親王奕劻著授爲全權大臣會同李鴻章妥商應議事宜劉坤一張之洞均著仍遵前旨會商辦理並准便宜行事該親王等務當往返函商折衷一是勿得內外兩歧致多周折

張之洞于蔭霖奏康有爲黨羽謀爲不軌於長江一帶放票勾結現拿獲逆黨唐才常等就地正法人心安定摺

上諭寄張之洞等據張之洞于蔭霖奏逆黨圖謀不軌派營勦捕一摺康有爲大逆不道久稽顯戮其逆黨唐才常膽敢潛匿上海創設自立

會散放富有票勾結各處會匪煽惑人心擾亂大局竄所奏種種悖逆情形實堪髮指除沿江沿海一帶已飭各該督撫嚴拿懲治外該逆窮兇極惡難保不遺其黨羽於西北各省地方放票勾結希圖一逞且摺內所指該逆已派人糾合大刀會並逆黨孫文已到山東至湖北襄陽等處之語該處界連豫省年來荒旱饑民衆多亦有會匪開堂放票之事並查會匪有潛往河南信陽州一帶謀覘北上諸軍軍火情事是該逆黨羽實繁有徒其勾引山東河南會匪已有明證確據況直隸山東正值拳匪滋事陝西亦有饑民偷該逆等勾串一氣互爲聲援一朝竊發其禍曷可勝言著李鴻章錫良裕長袁世凱端方徧飭所屬嚴密稽查認真拿辦如果該州縣等能將首要匪徒拿獲餘黨解散准其從優

呂海寰奏  
德皇覆書  
昭雪欽差  
頗爲欣慰  
惟請懲辦  
禍首電

保獎倫因循疏懈漫無覺察以致養癰貽患即嚴加懲處此事關繫重大該督撫等務當密速飭辦不得以接奉諭旨照錄通行遂爲了事

呂海寰電奏遞德皇覆書 大德國大皇帝致大清國大皇帝電貴大皇帝來電朕已閱悉具見大皇帝實願將本國欽差慘被戕害與教化相背各節按照貴國禮儀昭雪朕頗欣慰惟朕爲德國皇帝崇奉西國耶教不能以奠醊爲申雪之良法也查除被戕之欽差外尙有與朕同教之主教教士婦孺等多人均壹遵奉本教備受凌虐斃於非命今皆仰指貴大皇帝以伸冤貴大皇帝只飭奠醊豈足以慰此項無辜之冤魂哉照萬國公法當爲禁地之使署並受辱各國商民天主耶穌各教友以及同朕奉教之貴國人民均被凌虐攪害原不僅惟貴國大皇帝

是問而貴國執政王大臣並各省大小臣工所犯之罪原應論死以致教化各國不勝驚駭此等背義之員即應從嚴懲辦如果貴大皇帝能治其應得之罪朕甚願視爲足以折服各國之心倘貴大皇帝肯相幫助並准受害各國所派之官幫同查辦朕亦無不爲然至於貴大皇帝早能回鑾京師朕更深爲欣慰至朕所派統帥華德司朕擬飭其不但照禮迎迓而且俾貴大皇帝大遂聖心隨時用兵保衛聖安勦助勦匪該統帥均可盡力辦理至和局早定一節朕亦切盼惟議定和局之時不能不卹無辜受害各人員抵償各罪至住中華各國人民身家得以保全隨意奉教此係朕所厚望者也

由慶邸收電轉電瀋關  
端中丞轉遞行在急急

李盛鐸電奏遞日本國皇覆書 頃奉大皇帝帝國書慰唁書記生杉山

勸早定和局俾幸陝西電

彬欣慰之至並屬勸各國早定和局此事實保全大局不少惟大皇帝如果切望平和宜明降諭旨勿用守舊頑固之人亟應簡選中外重望有爲者另立一新政朔並望大皇帝停幸陝西速回北京以靖民心而表自覺開罪友邦之實據則各國豈有不允議和之理務求大皇帝諒朕誠實之意

伊犁將軍長庚陝甘總督魏光燾新疆巡撫饒應祺奏遵旨保護在甘在新各國官商幸未啟釁情形摺

旨寄奕劻著商派近支王公致祭太廟及東西陵等處

刑科給事中王鵬運奏叅首禍諸臣情罪重大請速交廷議摺

二十一日 行九十里駐蹕安邑縣之北相鎮

上諭現在和議未成河南防務緊要于蔭霖著速行赴任

上諭此次洋兵進城在京文武大小各員如有矢志殉國臨難捐軀者亟應予以旌揚以彰忠節著留京辦事大臣崑岡等會同順天府詳晰確查奏明請旨辦理倉場侍郎長萃劉恩溥現在何處著一併查明具奏

### 二十二日 行七十里駐蹕臨晉縣城

調補太常寺卿順天府尹臣王培佑奏爲敬陳京城內外近日情形恭摺仰祈聖鑒事竊臣前於聯銜恭請聖安摺內曾將京城情形略陳大概月餘以來宗社均仍安固內廷亦復無恙惟各衙署被洋兵佔據日久庫藏公文多有損傷城內外居民鋪戶始被洋兵搜取財物全行關

王培佑奏  
陳京城內外  
近日情形

閉近因日美兩國較爲平善市面漸有交易惟德兵騷擾甚苦各城門  
出入搜索商民畏懼裹足慶親王與稅務司赫德議興商務屢經勸諭  
各商惟該商領洋票辦貨先須供給洋兵然藉此糧價尙不甚昂良有  
裨益近畿城邑村鎮前多被亂兵搶掠近中復有匪徒嘯聚洋兵輪番  
出城仇殺西路良鄉城關南路榆堡龐各莊等村鎮俱焚燬殆盡臣迭  
飭該縣等加意撫卹而道路梗阻附近有洋兵駐紮稍遠則固安等處  
匪徒仍假義和團爲名乘機煽亂勢同流寇順屬本無兵可派又不容  
在京官吏經理迭經密飭各屬盡力籌辦而情形仍萬分危急自護督  
臣廷雍派兵勦辦保定附近報稱肅清惟我兵未經調到近畿又不能  
繞往東北幸兩路拳匪尙少洋兵亦未遠出現據平谷懷柔等縣稟報



伏莽尙多勢仍岌岌可慮臣令飭多募役勇以救眉急復函致護督臣  
廷雍設法派兵兜拿分別懲辦以期消患未萌目下都中士民皇皇日  
望大學士李鴻章來京今尙未到和局一日不定即人心一日不安曠  
日持久事變難可逆料臣瞻望闕廷吞聲飲泣擬俟申報到齊詳細具  
陳現經奉旨調任謹將大概情形據實陳明再今歲秋禾頗稱豐稔凡  
亂兵洋人未到之處均已收穫登場差堪上慰宸廑所有敬陳京城及  
各州縣近日情形緣由謹恭摺具奏伏乞皇太后皇上聖鑒此摺借用  
大興縣印信拜發合併聲明謹奏光緒二十六年閏八月十一日發二  
十二日奉硃批知道了

二十三日

駐蹕臨晉縣城

雲貴總督丁振鐸奏法人窺伺邊界意圖開釁請密籌防務摺

旨寄丁振鐸法人居心叵測自應預籌戰守以固邊圉

旨朕奉慈輿巡幸西安自太原以至蒲州頗形旱象所有蹕路經過之陽曲等州縣應徵本年錢糧著加恩豁免

瞿鴻機奏密陳根本大計摺

旨電慶親王現在京城倉庫多被焚燬旗步各營月餉官員俸米久未開放所請撥銀一百萬兩著各督撫如數劃解

另札上海道分電各督撫並先行籌墊

二十四日 行八十里駐蹕蒲州府城

慶親王奕劻電奏 近晤德使聲稱接本國國王覆電必嚴辦首禍之王大臣並須各國公使公同議罪然後再議賠款等事事局至此不辦

首禍彼斷不依惟各使隨同議罪一層有關國體當與李鴻章力與磋商再行奏聞

上諭電奕劻李鴻章嚴辦禍首依中國例督撫大員罪至遣戍而止自非大逆不道從無加刑之理毓賢當免其一死董福祥但聽朝廷調度戰事非所得專礙難加罪一時亦未便撤其兵權著該大學士與各使極力磋商爲要

軍機大臣奉上諭札蘇松太道知悉現在慶親王回京辦事需款甚繁著上海道向匯豐借銀一百萬兩迅速設法解京俟各省解到京餉內劃還

李盛鐸電奏

謹就管見所及酌擬現在辦法數條上備聖明采擇電

一美係中立之國此次事起即有人議將來是非當以美爲公正人判斷可否宜頒國書請其居間排解 一請溫諭赫德妥籌了結之法並派令參預和議藉以聯英 一山陝如有存留教士請破格優待諭令轉電各處教士安居勿生疑慮 一五洲爲一大戰國不能閉關自守勢難全用舊法西人因我政治不同非笑厭薄召侮之由擬請明降諭旨采用泰西政治飭各督撫保奏通達中西政治之人條議以備采擇施行其所舉之人不論僚屬布衣均堪保薦薦而得人破格錄用人心奮厲外侮自除 一借才異地古人所稱日本聘用西人爲顧問官多至數十人有議政權無行政權一無流弊擬請先就美國聘用顧問官數人曰外部曰警部曰學部爲討論交涉學校保甲等項之用次第舉

行此事不特聯美且示無排外之意彼族自當感動以上各條皆體察中外情形內政外交實相表裏如蒙采擇施行於款局或有裨益

二十五日 行五十里駐蹕永濟縣之上蔡村

上諭寄奕劻李鴻章皓電悉此次肇禍諸臣前經按照情罪輕重降旨分別懲辦朕心一秉大公毫無掩護之意卽如怡親王溥靜貝勒載瀅載澄中外疊次電奏均未指出朕亦據實一體懲辦可見此事始末中外傳聞未必盡確而朕之懲處諸王大臣並無徇縱亦可昭然共揭所有已革之王貝勒等業已不准其隨侍行在其嚴議議處諸臣俟各該衙門議覆之日再行降旨示懲至山西省拳教讎殺巡撫毓賢辦事操切業經開缺不用此外尙有何員並無主名無憑查辦以上各情形奕

李盛鐸致  
所派中國  
大臣日廷  
無異官電

勘皆所深知亦當會同李鴻章與各國使臣明白宣示切實磋磨俾釋  
疑議否則渾言懲處之重輕泛指查辦之疏漏反覆詰責開議無期恐  
大局將益不可問至如其所請處分該親王等亦知其不可惟究應如  
何分別輕重辦理得當之處不妨擬議具奏候朕定奪

### 二十六日 行三十五里駐蹕潼關廳城

李盛鐸電信 日外部照會稱中國所派議和之王大臣日廷毫無異  
言惟此事牽涉各國一俟各國允認即行開議等語盛鐸  
上諭此次巡幸西安該省亦有旱災前據戶部奏准將該省應解京餉  
二十萬九千餘兩截留備用並撥江浙等省協濟銀三十萬該督撫迅  
即分批起解至江蘇截留海運漕糧暨清江浦轉運局採買米石並著

廷雍呈樞  
垣法兵到  
保迫令悉  
插法旗應  
付術窮請  
示稟

兼程趨運解赴行在

直隸布政使司布政使覺羅廷雍謹稟王爺中堂大人閣下敬稟者竊查法兵到保情形業已另牘馳報鈞鑒在案本月二十日午刻法國杜統兵挈同歐教士等由容城縣陸路率隊百餘名來省隨至司署拜會當即接晤詢其來意已與昨函微異似有久駐之志始言兵隊不入城中繼則反復其詞並云德國日本將聯軍而至必用兵力攻取伊此來係爲保護迫令本日下午二點鐘於四城門樓通衢街巷悉插紅藍白三色旗以免他人蹂躪兼欲於城上置守旗之兵等語職司轉囑繙譯告以兵隊久居城內外商民皆將遷徙一空從何購買食物城池有城守尉專管該尉耳聾難與語言且與旗兵雜處不免生釁至插旗一節

亦應請命督憲未便專擅層層駁詰該統兵雖似詞窮遽云食物即使缺少不患無取之之處城守既有專官彼向理論自能使其不聾兵居城上亦可兩無妨礙插旗之事刻不容緩云云職司臨事籌思與其決裂而無濟大局不如委曲求全或可保全省城倉庫監獄暨數萬生民之存活復再四與之婉商令其繕寫憑函以爲真心保護決不騷擾之確據旗則我國龍旗與之並插均經該統兵允諾餘則依違其詞毫無定論惟洋情叵測以後旣難逆料而各國聯軍復又將來勢將何以應付智術兩窮職司一身一家不足惜其如大局何惟有仰求訓示機宜俾有遵循無任翹企待命之至專肅馳稟敬叩福綏伏乞垂鑒職司廷雍謹稟閏八月二十日亥刻發二十六日到



奕劻等奏  
美外部稱  
中國自辦  
罪魁可止  
洋兵西犯  
電

慶親王奕劻大學士李鴻章電奏 接伍廷芳電美外部稱各國意見  
必須嚴辦首禍端爲罪魁剛趙亦情罪重大並查明有無寬縱疏漏中  
國宜嚴誅殛竄逐之等語又云中國如能先自嚴辦庶可止洋兵西犯  
卽不能盡如各國之意亦宜及早安置屏絕不可再令隨扈於是端莊兩  
邸遂留潼關不前

劉坤一電奏 接晤駐寧英領事據稱接本國電極願議和絕無他意  
左副都御史何乃瑩奏協辦大學士剛毅行抵侯馬驛因病出缺摺  
二十七日 駐蹕潼關廳城

軍機大臣札知記名提督丁鴻臣奉旨近因洋兵聯軍西行已飭夏毓  
秀統帶所部扼守韓侯嶺該總兵著仍駐紮聞喜毋庸西來俟夏毓秀

伍廷芳致  
樞垣美總  
統覆書謂  
嚴懲禍首  
即可議和  
電

過境時一同前往韓侯嶺一帶駐紮

伍廷芳電遞美總統覆書 謹將國電遞總統二十五接覆書文曰大  
美國大伯理璽天德問大清國大皇帝好貴國駐美大臣面遞閏八月  
二十一日大皇帝國電一道接覽欣慰中國變起傷害各國臣民大損  
利益大皇帝願各國盡捐嫌隙和商妥議敵國實有同心前經照會各  
國盼望速結大皇帝素重邦交招徠保護今釀禍衆魁不特貽害各國  
並且獲罪中朝如蒙大皇帝權操自上能嚴懲罪首使各國深信諒和  
局即可開議等因請代奏

二十八日 行四十里駐蹕華陰縣城

旨寄貴州提督夏毓秀探聞洋兵將至保定恐再西趨山西防務緊要

著該提督統率所部並丁鴻臣一軍迅赴韓侯嶺一帶嚴防以顧行在後路

旨寄劉坤一岑春煊所有江浙漕糧著劉坤一飭惲祖祁改道由漢陽襄陽運至龍駒寨岑春煊派員到寨設局轉運到陝如水淺阻滯改設荊子關速卽照行

旨寄裕長于蔭霖錫良岑春煊夏毓秀據岑春煊奏洋兵將抵保定誠恐並力西趨所有河南山西防務緊要著該撫等各派營分紮雲南總兵蔡標著留陝西速卽募營成隊由岑春煊撥給餉需夏毓秀著仍駐韓侯嶺丁鴻臣一軍歸該提督節制

二十九日 行七十里駐蹕華州城

劉坤一張  
之洞奏各  
使首以懲  
辦禍首爲  
請否則不  
能停戰電

旨寄劉坤一大同鎮劉光才現已起程赴任著催令取道河南探有緊急軍情即擇要接應其山西以東防務如有洋兵西趨亦即相機堵禦旨寄裕長現在駐蹕長安需糧浩繁陝省適值荒歉着裕長無論何款速提銀十萬兩購買米糧由陸路運陝又河南現存賑餘糧三四萬石並先運赴行在

劉坤一張之洞電奏 此次與各國議款各使首以懲辦禍首諸臣爲請業奉電旨飭令全權磋商該王大臣自必竭力商辦惟現聞直隸保定一帶已經焚燬不堪洋兵又陷紫荆關關外即係山西大同府境保定探電洋兵將赴大同屢接李鴻章電及洋報言罪魁不辦斷不停戰戰既不停卽不開議款議多延一日洋兵即多進一步佔地愈廣賠費

愈鉅將來款議愈不可問各國議論皆以回鑾爲請計惟有速懲首禍  
或可以抵制要挾回鑾臣等詳觀時勢憂心如焚不能不爲皇太后皇  
上一再陳之關中歲荒民困氣象已不似漢唐舊都即有潼關黃河之  
險亦須築臺設礮方能扼守上游地僻水歧處處可越防不勝防豈能  
專恃地險若果聯軍西來斷非董福祥程文炳諸人所能抵禦况鎗彈  
空乏豈能以區區數千之兵當八國悍銳之卒此地利之不足恃也鑾  
輿駐陝需用浩繁西北力有難支東南責無旁貸目前沿江沿海各省  
聲勢聯絡尙可妥籌接濟一有決裂恐難任我轉輸近接各處電信備  
述各國意旨有言宜分攻晉豫者有言宜進兵襄樊者甚且欲以留還  
洋款爲詞禁我轉運京餉和局一變敵艦卽來各省專顧籌防關中將

成坐困此接濟之不足恃也各省人心浮動會匪徧布謠言湖北漢口安徽大通蠡蠶思起幸即撲滅現經查出富有匪票已發到二千餘萬張湖北郵政局并搜出逆信多件康梁孫文等各挾重資四處勾結將圖報復萬一敵艦來侵何從兼顧和議一變各國分路進兵匪徒乘機起事內外交訐天下騷然矣此又時局之大可慮也總之以一國敵八國強弱異勢累卵之形無待著卜坤一等自聞兩宮西幸道路艱難備嘗困厄蕪糞豆粥泔麥飯屬在外臣不能爲國分憂抱慙何地想聖駕抵陝以後臨朝輟食中夜旁皇即天下臣民問心亦難即安惟是此次拳匪之變該王公大臣皆所目擊試令返己自思當不忍以數百年之宗社因諸人而遂至阽危兩宮之聖明因諸人而屢蹈驚險數百萬

生靈之身命因諸人而久受兵戈若再遲延不決各國宗旨漸變勒兵進逼必俟回鑾方肯開議彼時更難措手矣總之各國此時措辭尙云不肯逼迫兩宮故必懲辦諸臣足以表明朝廷無開釁之意先懲驕將所以解釋榮祿無縱兵之疑雖不能盡滿各國之意然亦豈能盡拂六強國覆書之請亟應早籌辦法密飭全權大臣告知各使從容妥籌斷不庇護不然我雖竭力剖辨祇屬空言彼置不答進兵如故大局一潰開議無期伏乞聖衷獨斷早定大計以平各國之憾而聯各國之情庶幾早日開議足以挽救危局不勝迫切之至謹奏